

四庫全書

集部

欽定四庫全書

集部
梧桐集卷十九

詳校官編修臣翟槐

中書_臣劉源溥覆勘

總校官進士臣楊懋珩

校對官助教_臣胡予襄

謄錄監生_臣馬步蟾

欽定四庫全書

梧岡集卷九

明 唐文鳳 撰

贊 傳 銘 賦 祭 文

唐公子善小像贊 夢中作

煌煌隴西熒熒晉昌移根接李亦葉歸唐猗歟我公紹
述遺芳乃祖乃父虎躍蛟驤厥昆厥季鴻飛鳳翔靈椿
先老摧於秋霜幸存慈母晚節康強以全孝養福壽延

長公之少也金玉其相公之老也松栢其蒼式瞻遺像
精神洋洋餘慶不泯厚澤猶滂游魂雖逝英氣未亡我
作贊語虹吐夜光傳家永久百世不忘

望雲思親圖贊

有序

望雲圖者都事朱公為思親而作也公世為霍邱人
蓋因親以寄意於雲非因雲而致思於親也贊曰

白雲孤飛起於天末人子思親因雲是託所思伊何具
慶在堂溫清莫待甘旨未嘗大行之山霍邱之地人則

同心時迺異世親年有限雲氣無常以聚以散俾壽俾
康仁傑顯唐壽昌名宋孝行遠聞勲業逾重肅肅蓮幕
峨峨薇垣贊治揚譽洽于大藩大藩所蒞惟邑惟府或
勸或懲或字或撫移孝為忠于子于臣非忠非君非孝
無親斯圖是徵斯贊是述惟公孝思有永無斁

題李原哲小像贊

貌清氣腴德醇行孚身居五獻之晴湖神遊八極之太
虛其山澤之臞乎其列僊之儒乎非斯人也吾誰為徒

題陳子衡春日行樂小像贊

春服之禴如其來于于春日之煦如其行徐徐經南江之潏
望北堂之居念陽和之德澤知寸草之春暉慨王事之靡盬
柰陟屺而未歸聊尚羊以自適斯樂也何如斯樂也何如吁

鄭氏雙節傳

鄭國英婦王氏以節見舉於鄉人將申請間仇家誣以
不實於御史臺御史陝右韓公重其事即日帥郡守八
閩黃公教授天台江公躬詣其鄉拘集鄉里高年知識

歷言其節如出一口因詣其家但見中有元史忠義傳
懸於壁末有其妻聞之君苟死吾其相從地下矣之句
愕然嘆曰節孝世家併以鄭玉婦何氏守節之情上聞
雙旌其門按王氏名禪歙人也何氏名萱浙人也王於
國英何於子美皆側室國英子美堂兄弟友愛惇睦先
後繼卒值時荒歉干戈日尋征科日倍負孤農圃計日
紡績三十餘年貞操無瑕回視其世母鄭昌齡妻孀居
六十一年壽享九十有六始終一節者大有光也君子

謂王何年相若同門同苦於始同榮其終婦道之冠姆
儀之尊因小人之誣引君子之敬不特聯美栢舟之詩
又將得乎拔茅連茹之易邪

鮑節婦傳

節婦姓宋氏名禮玉欽北寧泰鄉人也世以賢雄鄉里
節婦幼在室專於女紅性樸而淳不尚華靡在父母側
愉愉無疾言厲色以孝謹聞擇配名族年十有九始歸
於鮑尚裝鮑為儒宦宗家庭肅睦凡婦入門必遵禮服

勤節婦事舅姑以孝相夫以敬撫育前室子相以慈愛
尚製能詩文工書精歐陽體篆隸亦可觀洪武初郡太
守王公以賢良舉一時翰苑名流推轂授翰林院典籤
尋除編修陞修撰蒞職甫三載出為耀州同知在任未
考滿俄以事株連不幸物故而節婦惇惇弔影抱其所
生子長安馳馬至京師收其夫遺骸還鄉辛苦萬狀道
路見者莫不哀之舅老而姑病悼其子死非辜怏怏觖
望節婦去脂澤躬儉約經紀其家政終喪舅姑相繼卒

塋祭合宜不五年子長安亦天遇相不異己出娶婦抱
孫克底成立今年踰五十有一矣康強無恙蓋天之報
施而祐其苦節邪先是節婦歸父憫其年幼子喪欲奪
其志婦泣而告曰曩與吾夫於耀州官廨月下謂曰設
若不幸罹禍汝肯守志乎婦具以實心對夫喜曰汝若
是吾無憾矣既已許之豈可以死生而異其心乎奉老
恤幼以迓續餘休庶無負吾夫也父語塞而止其子相
事之如所生母恐其名不傳迺屬子傳其事子與尚裴

篤斯文友誼故不辭而書之以俟觀民風者采焉唐先生曰予嘗讀宋史知鮑氏父子爭相死事而以慈孝稱前元江婦守節自誓郡邑白于省部將旌表其門不幸壬辰倣擾而止今宋婦亦能厲志以踵江後可謂能繼美矣嗚呼父之慈子之孝婦之貞何獨見於鮑氏之一門豈非觀感而然歟嗚呼賢哉

許孝女封股傳

孝女姓許氏名淑玄城東故家許伯玉女也自幼警悟

縫紉烹飪無不精絕稍長能書算名數論語孝經列女傳母孺人李氏口授輒成誦年十七伯玉病羸弱食飲不進百藥弗効孝女依依侍側憂戚若不能生者或言刲股可療孝女聞之乃齋沐祝天持刀入私室刲左股肉和麋以進伯玉聞香氣盡啜之疾頓愈舉家嗟異閭里姻戚咸稱為孝女後二載伯玉疾復作孝女更欲為之未及而伯玉卒孝女悲號終喪不輟年二十一始為上路張以信妻詩禮家也孝女入門事上撫下不少遺

禮法不幸舅姑先沒太祖介玉翁在堂孝女奉事尤謹
脯饒酒漿及老人所宜用者靡不備具咸稱為賢婦鄉
先生江文興為述其事甚詳既沒其孫惟達特以示予
請為傳論曰三代以前未聞刲股之說後世醫書載人
肉能愈痼疾孝子爭趨之至有剖脇取肝以為孝者豈
欲矜其名而為之哉父子天性也親病在牀坐藥無功
危在旦夕為人子者迫切至情不惜肌膚剝于刀及以
期萬一之幸非孝誠之至能如是乎蓋於斯時知有其

親不知有其身故也若淑玄真可謂孝女矣孝誠根於心孰勸之然哉彼進食怒罵臨死不顧者聞孝女之風可以少愧矣

朱節婦傳

節婦姓鰲名妙真贛人也夫族為宋孝子朱壽昌之裔其先居南徐世以儒宦顯因仕寓贛族大以蕃父以道任鹽課提舉弟彥才擢昭信校尉節婦幼在室事父母以孝謹聞年十六歸朱崇文事舅姑以敬慎稱承祀以

誠理家以儉相夫以順甫二十八歲而崇文卒室若懸
磬一子顯始周歲節婦辛勤萬狀以長以教卒底于成
顯率訓知學肄業黌宮才名籍甚將試于用洪武庚辰
按察僉憲裴公行部廉察民風以婦名聞僉憲呂公覈
實無異得請旌其門閭蠲其賦役云論曰天道玄默
人謂難諶然報施之理無毫髮爽壽昌孝行卓著炎宋
天以名宦報之非特施其身而及於後裔猶未已也復
以節婦承之則天道之報施豈難諶哉嗚呼自古忠孝

節義史不多見世或得其一二史臣必謹書而備錄之
蓋重人紀扶世教以為激勸地也歐陽公傳五代史載
一李氏謂當時士大夫之所不若其抑揚予奪何如哉
今節婦全貞保孤旌寵自至俾人婦皆心其心則世教
豈不植哉天道豈不明哉嗚呼若節婦者抑可謂賢矣

孤雲處士傳

孤雲處士者不知其世系一日得其鄉先達前太常司
丞呂君仲善所撰其兄文郁墓誌銘始知其出於歐陽

氏世居廬陵之富田迺文忠公裔父本立樂平川山水之勝卜居城之西山迄今三世處士名文質生平無他嗜好性恬靜不樂奔競而心思精巧專攻丹青篆刻能致其妙理於山水得其幽深寬闊之趣於神鬼得其變化奇詭之狀於圖書得其篆籀體製之古於傳神得其顏貌態度之肖於雕鏤得其字畫式格之精是以人皆愛譽之然其心跡不滯於物不屑於利遇適興或研朱吮墨或鑱石弄筆頃刻而成人或以工藝目之輒搖手弗

應惜未嘗有以家學語之而僅施其巧如是而已每與人言曰吾浮沈於世如孤雲無定蹤故咸稱為孤雲處士云論曰大朴未散人文未滋及乎末運朴散文滋日趨乎巧則人心之天已離矣然而四民之業各有其所專殆不可以兼也為士者何事曰尚志志之所存有其大者矣志於游藝亦聖人之所與但有先後之序耳孤雲處士不用其巧於機械變詐而用之以成執藝之名益猶善於用巧者抑亦非大巧歟

嘗讀韓柳文雖巧者梓人亦為立傳以傳不朽蓋托
之警世也雄辭雅論煥耀今古予作孤雲處士傳豈
敢上與韓柳之傳巧梓例視哉然孤雲之名則自將
不泯於天壤間也必矣敬跋

瀛溪書屋銘

瀛溪書屋者周啓宗氏修讀之所也屋在廬山之下昔宋周
茂叔家於舂陵而老於廬阜因取故里之號以名其川水為
瀛溪其水發源於蓮花峯下潔清紺寒下合於湓江而築書

堂於其上今其遺址去九江郡治之南十里久荒第不治至
淳熙丙申郡守潘慈明通守呂勝已復作堂其處仍揭以舊
名而祠以祀之太史黃魯直嘗為之序云茂叔人品甚高胸
中灑落如光風霽月酷愛漁溪退居乞身而老子是二程每
游從而問道焉明道曰吾再見周茂叔吟風翫月而歸得吾
與點也之意伊川曰吾再見周茂叔論道遂厭科舉之習此
周子之道得二程子傳之而益振後又得張子朱子紹之其
道大明於天下後世至今餘風遺韻沾溉未泯則斯道之

所寄有在矣今啟宗為其緒脩構書屋而揭書堂之舊
名俾其子孫知有其祖景行而不忘也歟子既為記之
矣而啟宗復徵予以言遂為叙而銘之銘曰道喪千載
孔孟失傳五星聚奎篤生大賢周子起矣程子紹焉大
道復明如日行天繼以張朱人文昭宣德貫今古學開
後先我我廬阜峯濯青蓮春陵水名移于茲川湯湯其
流涓涓其泉瀟溪是扁棟宇飛騫山川如昨人世幾遷
聞孫踵武後四百年迺建書屋經史精研道探其微理

鉤其玄遺編青簡舊物青氈繩繩弗泯惟爾勉旃我作
銘詩篆刻華璇有嚴對越終日乾乾

家山一覽圖賦

西江之廬陵大郡也為唐廬陵王所封之地故以名郡
當趙宋時稱四忠一節之鄉文章行義為世儒宗非他
郡比其地南接贛城北竟贛水東控臨川西連長沙咽
喉荆廣唇齒淮浙扼庾嶺之衝抵汀衡之界而江山映
帶一覽而在眉宇之間真勝概奇觀也康君彥民家西

昌之銅庄在郡上游據大江之右而宅其中攬清挹秀
據幽發粹而乾坤之淑氣蜿蜒扶輿鍾於人焉是以篤
生賢才若彥民氏其亦才而賢者歟君以明經第進士
淹留宦途踰二十載不得翱翔容與於其間上邱隴而
尋釣游每一追思未嘗不嘆息流涕而戚懷動心也迺
命畫史繪為家山一覽圖庶以慰心目而釋羈思子愧
吳蠶老不作蠶而抽思弗長也勉為賦之其辭曰惟衡
嶽之奠位兮迺鎮服於南荒氣磅礴以冲融兮形蜿蜒

而延長蟠踞於數十州兮綿亘於數千里欲高昂以低
伏兮儵馳突而留止既峯巒而巖壑兮又邱垤以陂陀
勢捲滄江之雲濤兮狀湧瀛海之風波分支走脈於八
埏兮旋轉迂迴於四域歷高廣而荆楚兮何巔岼以崩
劣峙九疑以賴吉兮駐西昌而銅莊乾坤一元之氣兮
生人才之賢良遇聖朝之樂育兮喜榮登於科第履仕
途之往復兮去鄉國之遙邁淹日月之悠久兮竟侵尋
於歲紀青原之峯屹屹兮文江之水茫茫眷祖宗之邱

隴兮嘒如斧而如堂想父母之第宅兮念姻戚之里巷
違老幼之譚笑兮疎友朋之論講每馳思於夢寐兮或
騁目於登臨嗟從政之留滯兮嘆蹤跡之浮沈追童穉
之釣遊兮悲壯年之離別遠舊業以難忘兮慘中情而
不悅豈效彭澤之賦歸兮肯慕神武之挂冠方致身以
委質兮當報國而輸丹將何以釋衷素兮托圖畫於毫
楮體御風而弗輕兮恨予臂之不羽指家山而一覽兮
惻鬱結之深思辨雲山之稠疊兮睇烟樹之叅差武姥

之蒼翠沾衣兮天心之危峰卓筆惟康氏之世家兮耀
文星於奎壁羌若人之賢才兮能尊主以庇民傳奕葉
以流芳兮道愈隆而德愈新篤天倫而義居兮尚統系
以會譜志學優以出仕兮挽淳風於復古朝耕犁於畝
畝兮晚牧放於郊原力務本於稼穡兮以勵業而名軒
緬懷四忠之令譽兮景行一節之大義偉精忠直節之
無窮兮振古今而塞天地期若人之繼踵兮當配立於
綱常明君臣之禮道兮名彌久而彌彰著勲業於史冊

分勒功績於彝鼎歷百世而益長兮逾千載以不泯許
曰美哉一覽之家山兮縱達人之大觀移景物於圖畫
兮妙吮墨而研丹認依稀之故境兮胡不夷猶而容與
離菊疎而松逕荒兮攀桂枝以延佇清泉白石以同盟
兮猿驚鶴怨而增吁矢予心以遠大兮永書紳而弗渝

祭考妣文

惟我考妣積德深厚如水益深如木益茂以培其本以濬
其源本天者全源理者蕃天符德著德協理正以引以

延協于義命李唐之裔嗣續晉昌惟宗攸熾惟世有光
暨于小子承後弗力莫紹徽音曷繼丕績自膺朝命授
職治民作宰五年政化維新改除王官輔導斯試才愚
學疎寧不懷愧惟考惟妣英靈冥冥錫我默相明德惟
馨扈從北行弗克省墓松楸鬱然戚于衷素敬遣家禎
含哀瀝誠有微以薄醴甘以清白雲在山明月在水魂
飛遙遙血淚如雨

祭大尹見山先生何公文

惟公出宰茲邑牛刀小試衣錦之鄉壤接荒裔弗肄詩
書弗閑禮義迺設學宮有嚴歆祀師徒弦誦風俗淳懿
鄒魯攸同荆楚豈異蛟峯雄文文山偉記照耀千載深
探奧理柰何阨基文獻墜地道無古今時有興廢嗟我
非才後公百禩載瞻載慕是憂是愧裴回殿庭草莽荒
穢誓言修葺政化攸係茲陳薄奠醴酒敬獻公其默相
尚冀竣事江山不改還復佳氣

重修安湖書院祭先聖文

王化聖道治教並行無間遐邇日星昭明教道攸重治
化斯興為帝之則為國之經平川萬室弦誦輟聲衣錦
邊僻俗尚鬪爭有宋何令稽古是程迺書院訟理政
成以變民風以導民情今踰百稷棟宇摧傾同寅協力
矢言經營以堂以廡以戶以局庖湑式具倉庾式盈竣
事畢工勒石紀名茲焉告祀以瀝衷誠牲醴維潔黍稷
維馨對越在天陟降在庭文教誕敷洋洋炳靈

重修安湖書院祭先賢文

惟我元公紹述道統引微綴絕萬鈞斯重不有先覺伊
誰其傳道之顯晦實係于天惟我太中知人則哲二子
受學六籍探頤如星拱極如水朝宗門立暮雪座挹春
風卓哉何侯興邦書院身任政教風俗丕變文山死節
耿耿孤忠覺軒計議鳩材庀工成茲偉績傳于後世百
五十年竟就隳廢承乏興修萬瓦鱗萃祀享有祠像設
有位景慕先賢揭虔薦芳散實于俎酒崇于觴尚期來
格以康祀事以澤我民以祐我士

祭何知縣文

惟公顯于咸淳仕于興國文教率敷丕變民俗迺建書
院衣錦之鄉吾民有歸吾道有光迄今年久廢弛弗治
舊尹所作新尹攸繼茲陳薄奠肴潔酒冽名垂穹碑千
載不滅

安湖書院祭先賢祠

惟我諸賢道明濂洛啟沃後進實賴先覺師友淵源父
子家學纘承統緒有志述作六經精華諸子糟粕入海

求珠剖石得璞紫陽高風江漢洗濯文山大節日星昭
焯文教振興魯齊是若開基成構覺軒是託衣冠環珮
步趨唯諾聚于一堂丰姿如作元氣之會鳳翥龍躍式
當仲冬肴簾酒薄鑒茲來饗神歸寥廓

祭先賢祠

惟我諸賢倡明道學後於闕閩先於濂洛惟師惟友迺
繼迺承儒林鳳棲學海蛟騰惟父惟子以嗣以續滄海
遺珠藍田雙玉紫陽紹統文山翰忠理明而精節立而

雄下逮覺軒協力興邦舊跡猶存高風已往茲陳薄奠
牲醴瘠醢鑒茲來饗魂游何之

祭何知縣祠

惟公生而有位歿而有祠歷世雖遠遺愛猶思詠棠台
伯種花潘郎恩融德洽衣錦之鄉書院斯建教民興學
啓迪後進追蹤先覺茲臨是邑歸然靈光耳聞絃歌目
覩羹牆式薦蘋藻瞻仰起敬民俗以淳文風益盛

梧岡集卷九

欽定四庫全書

梧岡集卷十

明 唐文鳳 撰

頌 疏 箴 書

騶虞頌

臣聞天不愛道地不愛寶二氣絪縕委和降精產為非常之物而得天地之氣恒多故聖人在位迺見於世所以符運會之休徵協禎祥之吉兆其來尚矣欽惟我朝聖天子御寶

歷永樂之二年至仁洽於品物至信敷於烝黎道高往古功
冠前王以故神人懼戴乾坤清寧諸福之物莫不畢至維秋
九月之吉周王進獻騶虞羣臣百官上表稱賀臣考載籍騶
虞似虎白質黑文尾長於身不踐生芻不食生物日行千里
君有至信之德則見而召南之詩謂仁如騶虞以見王道之
盛也於戲昔詠於周世今獲於周郊於以見皇上之德施及
王國邁周文之治御于家邦至于兄弟因心則友蓋周王不
自以為瑞而獻之於皇上皇上亦不自以為德而歸之於皇

祖考薦之郊廟播之聲詩臣文鳳躬逢盛典職忝詞臣
自愧才學疎陋不足以鋪張休烈以繼風雅而區區芹
曝之誠亦少効揄揚之萬一謹稽首頓首而獻頌曰惟
我皇明繼天承統九五龍飛雲蒸霧滃攘剔羣雄奄有
四方君德以正帝道以昌寰宇乂安垂拱而治大國小
邦奉琛納賁四十餘載風雨順調烝民熙樂年穀豐饒
欽惟聖皇誕膺天命朝野肅清神明協應惟臣惟鄰惟
庶惟民迺洽至信迺歸至仁天地之氣世運所聚泰和

至順千載攸遇精英斯降和粹斯鍾佐我文明物類之
豐惟物伊何見彼異質生芻弗踐生物弗食有白其軀
有黑其文渴則泉竭饑則肉醺觸之不怒性無噬齧迫
之不驚心無奔越皇仁所被皇信所孚惟皇德廣來茲
騶虞產于王國獻于天子載書彤管載彰青史式昭祖
考聖德益宏休光令聞奕世是程白狼興周素麟紀魯
示祥効禎粵萬萬古惟皇撫運續武之功惟皇致治興
文之隆禎祥至矣福祿萃矣本支百世炎祚著矣小臣

作詩上徹宸聰以雅以南用播國風

寶石神龜頌

欽惟太祖高皇帝龍飛淮甸提三尺艾羣雄天命攸集
人心所歸四方臣順八蠻賓服啟萬世之洪基承百王
之正統武威遠震雷迅電飛文教誕敷風行草偃神祇
協應民庶懽忻而四十餘年乾坤清寧河海順晏雨暘
時若物類咸豐臻政治之雍熙變風俗之淳厚是以聖
德神功配天饗帝巍巍蕩蕩高深難名歷代君天下者

未有若我朝之隆盛也猗歟休哉惟我皇上繼志述事
膺命承符神器有歸皇圖克紹御寶厯之初念創業之
不易思續緒之攸難爰命詞臣纂修實錄敬上尊號所
以極采輯之勞竭褒崇之美猶未足以致聖孝也惟孝
陵之御碑未立特發玉音勅翰林譔文諭工部選工相
擇碑材於紫金山之陰龍潭之地斧錐効力琢鑿山骨
取材既具復取碑趺而得巨石大與材稱顛顛以高萬
夫奏功於石罅見一寶石其色蒼紺形類神龜圓徑八

餘首昂而前顧尾妥而左蟠足縮而肘露背隆而甲伏
雖倭般之巧不能致也况茲渾然天成不假雕鏤豈非
天地儲精山川獻奇而致禎祥以彰聖孝也孝陵衛監
工指揮臣某敬捧以進皇上若曰朕惟皇考之德所感
召天地神祇所默相故茲瑞呈現以對揚皇考之休命
以慰朕繼嗣丕烈之心也宣文武羣臣百官於奉天門拜
觀莫不欣躍謹上表稱賀臣聞馬圖出河龜書呈洛銀
甕湧地器車在山此皆聖王之瑞也唐太宗朝獲靈龜

化為白石遂以為受命之符自開闢以來未嘗遇茲盛典然天地之氣鍾英孕靈陽凝陰聚堅則為石稟少陽之精成少剛之質而融結其形成此神龜者蓋有以知皇上孝思之無斁聖德之無窮而又以徵諸聖壽於萬斯年也臣文鳳叨侍清班自慙愚昧謹拜手稽首而獻頌曰於赫聖皇孝德格天山川獻靈神祇致虔天不愛道地不愛寶式昭皇心尊崇皇考勒碑琢石有龜其趺取此山骨蛟龍所都坤珍効靈乾符顯瑞億萬斯年精

英攸萃爰有寶石形類于龜當護慶雲當生神著托質
石中豈能食息其形圓長其色紺碧尾蟠而妥首仰而
昂背隆甲伏肘露足藏二氣所凝匪資人力渾然天成
無斤斧跡五總之聚十朋之多矧茲祥物孰與同科皇
明大朝惟聖繼聖以承帝統以膺天命戡我孝陵祥光
貫虹聖德煒煌御碑穹窿微臣作頌以贊休美用比洛
書永錫繁祉

進軌範錄疏

臣聞經所以載道史所以載事窮經則精於道而有以
識夫理義考史則熟於事而有以得夫政治是以古帝
王之學未嘗不探六籍而閱諸史也易曰君子多識前
言往行以蓄其德書曰王人求多聞時惟建事學于古
訓乃有獲此之謂也然天地之道古今之事非融而會
之紬而繹之則不足以獲于訓蓄于德矣致知乎理義
力行乎政治莫匪識前言往行求多聞古訓而得之也
敬惟殿下以天縱之資日新之德聰明剛果仁孝禮恭

建國封藩行本支之盛礪山帶河固盤石之安威名播
於宇內深恩溢於域中羣黎仰慕莫不歡切念臣文鳳
才疎學陋愧無知識欽蒙特旨授以紀善自領職以來
雖承顧問日淺然夙夜祇懼思竭補報輔導之誠以忠
殿下之職分度無所用其心力迺採擇經史有關於理
義政治之言切要簡當易知易行合于聖賢之道者謹
繕寫成帙裝潢上進乞於軍國機務之暇宴閒講說之
餘留心睿覽庶可以少裨多聞蓄德之萬一臣忘其愚

朴冒昧威嚴不勝戰慄之至

縣令箴

周官縣正則惟其名升自里都五鄙是稱秦立郡縣漢制令長丞尉以佐教化攸掌唐制六等宋用朝臣慎重其選親臨於民上應列宿出宰百里俾無愁嘆政平訟理欲成其政先修其身當恤於民毋負於君正爾之心鑒空衡平勵爾之操蘖苦冰清毋墮庸庸毋過察察毋苛刻而殘母邪媚而狎同寅協恭庶務理集弗譽以喜

弗謗以惕戰戰兢兢執玉捧盈凡百在位敢告斯箴

上劉知縣重修紫陽書院書

嘗聞堯舜禹湯文武之道得孔子而後傳周孔顏曾思
孟之道得朱子而後明蓋孔子集羣聖之大成而朱子
集諸儒之大成前庚戌而孔子生于東遷後庚戌而朱
子生於南渡嗚呼聖賢之生闕乎氣運之盛衰教道之
顯晦豈偶然哉故能為天地立心為生民立命為往聖
繼絕學為萬世開太平則聖賢之道在天下如菽粟布

帛民生不可一日無也道之所漸被教之所陶鈞無一物不沾其化無一民不蒙其澤玩其詩讀其書不知其人可乎新安為朱子父母之邦猶魯之闕里也自朱子歿後將二百有餘載學者即桑梓之地為尸祝之所以致其崇德尊賢之意宋朝丙午間穆陵賜以紫陽書院四大字刻於真珉至今尚存書院凡三燬三復一燬於水再燬於兵當我朝之初於用武之際首創書院於學宮之旁部使黃公德芳知府魏公均祥協力經營而我

先人白雲翁委職祠吏辛勤三載始克落成距今三十
五年凡居牧民之寄者或謾爾修葺或畧不留意兩廡
傾圯三門朽腐椽瓦蠹缺風雨震凌生徒學士過之徬
徨太息仰惟閣下以明敏之識超卓之才榮膺寵渥作
宰於歛民親之如父母敬之如師保將有以蘇其凋敝
樂其安靜政之所施教之所被百里之間熙熙皞皞無
愧於古循吏下車未久百廢就舉其於興崇學校一遵
朝廷之典而先賢之祠亦所當興復捐已俸募民力頤

指之頃不日而成惟閣下少留意焉區區窮鄉晚進言
不足以取信於人學不足以見用於世特以先人苦心
致力之勤將就隳廢是以惻然動念祈閣下之振作斯
文主張吾道俾祠宇一新則吾朱子在天之靈臨晚故
宮徘徊於風泉雲壑之間而知賢令尹之德也傳曰君
子學道則愛人又曰魯無君子斯焉取斯觀於是而益
信然則風化所繫人心所重政教所關豈迂濶瑣屑之
事哉干瀆高明悚息悚息

與弟子才書

自向果郵亭之別又閱兩載去夏六月七日之任一向
獨員署事諸務就理劣兄他無所長不過推平日所學
而行之耳以清介守己仁恕存心以故吏民相安於無
事又且同僚協恭推服欽慕凡前之為政有不利於民
者反之田野開闢流通回復學校興舉詞訟簡息賑飢
荒恤鰥寡安撫邊氓均平差役奏罷船夫理決滯獄申
寃直枉草奸去弊抑強扶弱禁貪治頑民心傾向時譽

頗歸凡上司按臨於稠人中必諄諄推許勉勵不置劣
兄在任不過如斯始終一念精白一心不為利欲所誘
不為禍患所怵守法而行據理而為處繁劇而不憚煩
遇艱險而不避畏其於禍福死生漠然無所動於其中
幸不幸一委之於天而已他毋足為吾弟道聞太守公
今冬復任劣兄既蒙舉薦彥禎姪亦荷獎愛吾弟又沐
勉之以學資之以俸其作興斯文之意為何如也嚴溪
子彰賢弟近況清適闔庭內外安好伯和兄年老強健

有子登科榮躋顯仕以膺長民之寄有光於吾門矣子
善兄又喜彥昭回鄉曾附書至興國吾弟既荷太守勸
戒期於成才經史之言心惟口誦夜以繼日勇往而進
庶無負此公之盛心也諸族中弟姪煩一一致意楮短
心長言弗能盡不具

又

今春彥昭姪便中得書備知二弟俱各安好良慰老懷
吾弟青年方春當悉心於學以迓續祖父之遺風吾儒

事業大有所當著力處付之悠悠則不能成其所有以致流光坐棄誠為可惜以吾弟為學知所嚮方宜加鞭辟譬如北適燕南走吳車航不具豈堪致遠中途而止徒勞人耳望吾弟充其問學大其心胸涉於事周於理則可以成其才而推於用豈可僅僅守兔園冊也此劣兄之至望吾弟勉旃勉旃劣兄自己卯夏六月初七日到任不過以理存心以廉律己勤力於民効忠於國他無寸長據平生之志推昔日之學凡百世人之所榮所

慕者無一念之萌守清貧安澹泊晏如也伯和兄晚節
康強白髮紅顏諸子孝養彥禎登科亦授縣正可謂顯
榮矣辱彥武書方得其詳欣羨欣羨本縣佐貳幕司給
由但劣兄獨員署事黃冊須知皆當究心是以忙逼不
得少暇小兒禎夏末歸家先遣德聚回乞知及未審太
守曾復任否不果專奉字族中長幼煩一一致意交游
中兩學及城府諸公俱道此忱寸心千里楮墨難盡不

一一

與弟子彰書

嘗思吾家自始祖承昉公隨蹕渡江留家於歙大有公厚貲陰德至庭瑞公兄弟五人聯輝科第事業文學延於吾祖筠軒翁雄詞鉅筆著書明道為學者宗師吾先人白雲翁詩文瑰偉卓冠時流而吾五兄弟者繼承其後長兄江安丞不幸兩考物故劣兄蚤居邑庠修業未竟引身而退自謂終老山林得遂所願豈意為虛名所累薦章交達叨承國恩授以牧民之寄膺命以來夙夜

祇懼思圖報效在職不過盡公竭忠以身徇國以理恤
民其於私欲無一毫萌於念慮間澹如泊如而不知宦
海之風波也府司部使上官廉察俱荷推與庶得少舒
其志氣而展其問學幸不負吾矣凡天下之務不能更
厯則不知其故以劣兄之處於田里戚屬相會昆弟相
親朋友相昵不知其為難遇今則各天一方巖溪之往
迴方塘之隱處何可暫得然後始知為難遇也別來聞
漆丁剏屋祖宗餘慶子孫傳業誠為可喜又聞營壽藏

何太早計呂家林文光燭天矣劣兄縻職數千里外吾
二弟之才豈宜終隱必當見用於時宜充其所蘊廣其
所見以光大吾家德聚至領手割披誦感慰今因回便
復此楮以盡欲言草率不具

又

老兄留京甫及二載中間數得手書如對面也近聞續
絃得人諸幼姪庶不失撫愛而家務亦不必嬰心少慰
目前膠擾甚幸甚幸老兄年近六旬不獲投閒置散而

處清要之地撫心愧慙但思守職効忠雖無涓埃之補而操觚染翰日近清光以盡吾分而已近奉旨侍講青宮開經筵以論道為聖朝之盛事而老兄振趨殿庭之下亦預僚屬之才屢蒙賜饌恩數寵加復回王府進講日以為例自秋初以來准擬扈從北行心旌搖搖靡有定止非冬深啓行必來春也吾弟守先人之邱隴居舊業之田園讀書訓子以傳家學其視老兄汨沒宦海者為何如哉相去日遠何由會合候至北京居處稍寧當

給假還鄉祭祖以盡契濶之懷臨書惘惘不及詳悉祈
心照不具備

奉伯和兄書

今年夏五月彥禎姪到京繼而彥武來叔姪弟兄得遂
會合良不易也且審壽體康強子孫侍養猶如曩昔但
劣弟從仕於外侵尋七載不得侍左右以盡友于之樂
又喜彥禎復任而劣弟愚拙如故忝在王府日侍清光
近蒙聖恩得陪講春宮弘開經筵迺朝廷盛典而日趨

文華殿屢蒙恩錫饌醴劣弟何幸身親見之邇者有旨
扈從北行但路途遙遙不得序契濶也良用怏怏未涯
侍奉惟冀保愛以膺耆福不具備

與姪彥武書

自令弟初陽尹考績便道歸省而吾妹篤念手足之誼
不遠途路而得面會良慰老懷癡叔今年六十遠寓北
京羈棲歷落侍傍無人奈何奈何近聞和齋尊兄遽棄
榮養何天之降割于吾家不少延也追思尊兄自幼隨

侍伯父宦寓南北歷練世故自能顯揚以致祿仕晚而
投閑故里優老林泉諸嗣幹蠱一子登科於人理無少
慊也今而壽踰古稀亦可謂無憾矣而吾妣愛親之心
為無窮也良可痛悼老懷徒增悲咽身隔四千里弔不
得哭位殮不得撫棺葬不得執紼但引領南雲失聲長
號而已哀當奈何痛當奈何今因宏德鄉友便附此以
代往唁謾有俸鈔二錠少致辦香煩為於靈几前焚白
緇惟大孝彊加餐粥節哀保體承家續緒惟吾妣是望

言不及悉不一

與彭必俊訓導書

記曰玉不琢不成器人不學不知道蓋玉之未琢與瓦礫同幸而遇良工焉則圭瓚穀璧瑚璉琖各適於用而器成矣人之未學與愚庸同幸而遇良師焉則天經地義民彝物則咸究其精而道明矣是玉之成器必待於工人之知道必待於師工有益於玉而師有益於人也大矣哉洪惟我朝建學立師內而胄監外而郡縣置

師弟子員服方領習矩步藏修游息周旋揖遜閭閻秩秩人才所萃猶羣玉之府也藍田之英崑岡之選旁蒐遠採靡不具焉予以砒砭之質韜彩晦迹幾為抵鵠之供矣一旦欽承玉音出宰平川臨政先務必以學校為首思教鐸之益振慨師席之久虛博詢慎訪俱以足下姓名對遐想玉人不我瑕棄必將翻玉海之波瀾以演濫其文學聳玉山之標格以嚴整其模範豈終於懷瑾握瑜而私善其身哉今特遣劉生齋禮幣至足下隱居

之廬以請儻幡然而起玉振乎始終之學玉執乎始終之敬以玉成乎玉立之諸生則待價而沽將聯玉笋班於玉階方寸地矣矧予鳴琴之暇揮麈而聽霏屑之談不啻飲金莖之露以清肺腑也何其幸歟草草奉楮不盡所懷惟冀為吾道自玉不具

答謝惟高司訓書

自去春龍潭餞別流光忽忽又隔兩紀歷矣區區深愧非才臨政之暇必旁求儒雅相與講明正學議舉時政

何茲邑寂寥無可語者足下歸自京師一見之頃心已
識之方幸資以相最豈意為職任所迫不得久於盍簪
良可慨嘆去秋得手劄寓諄切顧予何足以取信於足
下也然以足下之才之學得振教鐸為士子之矜式以
明聖賢之道其責任豈輕哉足下當研精覃思究精一
執中之旨盡修齊治平之方以裕於己以淑諸人俾人
才輩出庶不負國家樂育菁莪之盛意此予之所望而
足下之所任也區區撫字心勞催科政拙誠有如陽城

之考下下也無足為斯文道今因便翔壯此尺楮以為
興居調近於政餘有拙作詩文數百篇無暇錄藁奉去
儻有順風雄文佳什無惜見教以開老懷之茅塞會晤
未涯惟冀為吾道梁棟重不備

答謝子方司訓書

區區幼讀父書粗承家學年踰弱冠叨居教職中獲投
閑豈意為虛名所累舉授縣正私竊喜幸以謂江右之
地在昔宗工鉅儒挺挺相望意我文明之時文章道德

之士師表一代者必有其人也或可承顏接辭得以質
正舊學歷任三載已及瓜期前之所陳何寂寥耶獨聞
先生老成重望為時推崇久居講席屢司文衡而所謂
道德文章師表者在是矣職守所縻每恨弗得親拜絢
履為欠耳邑民邱子成蕭文郁輩累求大筆雄文辱不
鄙獎譽過情聯篇積簡愈出愈奇如入武庫戈矛劍戟
羅列森聚鋒鋌穎錫光采炫耀可喜可愕使人讀之久
不厭倦誠獨步也自顧區區才薄學謬拊心益愧而律

已治民不過攄平昔所蘊其於設施初無鬼目瀕耳之
蹟殆平平耳先生與進之心勉勵彌勤敷許太甚此昌
黎所謂不敢當不敢當也今因高第劉曾二友便翔翔
此猪以寄繾綣餘俟買舟朝京專造易菴講下以傾倒
所懷會晤有期惟冀為吾道棟梁重不具備

與劉凝節訓導書

嘗聞馬不值伯樂低首帖耳伏於櫪下玉不遭卞和埋
光韞彩混於石中及其受知而伯樂以為駿卞和以為

實則人皆知貴之矣士君子之見知亦猶是也予以學校為育材之地加意興舉主教者有黃廣文而兩齋司訓虛席已久去春訪求英碩禮聘彭君必俊試於天官領劄就職而西齋猶缺未得其人每究予衷茲以考滿赴京舊友蕭君讓敬授金川同知邂逅胥會相與話及學校之政迺語予曰吉水劉凝節氏年茂而質美學瞻而才優與彭君生同鄉學同道俾之同任吾興邑儒學師道藝足以相長學術足以相規而造就後進必有可

觀矣且遊於翰林侍讀學士解公縉紳之門公以佳士
待之品題推挽不遺餘力當道嘗薦其才而用之凝節
以母老辭謝而歸興國與吉水鄰封相邇得職便養凝
節必幡然而起吾當與吾令合辭請子聞而欣喜蓋士
君子之出處去就一蹈於禮苟不先之以禮則凝節豈
肯屑就焉故婚姻不備則貞女不行禮樂不備則賢者
不處此古之道也予當寓情於言致禮於幣以將予之
敬而讓敬為予具書先焉惟凝節以吾道自慎其必為

予而來也當令諸生汎掃齋館設臯比以俟予雖非伯樂卞和而凝節則誠千里之驥連城之璧也幸毋固拒以孤予之望焉草草奉楮伏祈亮察不備

答主簿高泰銘書

自白澗灘相會泊舟艤岸夜宿江天剪燭引觴久坐劇談忽忽取別又將一載然思慕之懷無刻不在平川公庭雙樹之側靜念人生出處聚散如浮雲斷梗卷舒漂泊何有定蹤昔未知同心之難今始識違顏之慘然參

商之星常自相背馬牛之風每不相及事之所遇屢如
是也祖行多沐厚愛足見僚友之情至今感愧交集聞
抵縣不久遽爾抱恙老懷惻然慮乏親子弟侍湯藥未
審近况何似黃以和來得雲翰知病勢退減喜慰喜慰
尤望善加調養力疾理政勾稽匡輔以成美治則庶可
以瘳民瘼而慰來蘇也然區區去後之惓惓者蓋不以
世俗之論待吾民彼之好惡在人而此之憂恤在己詩
云我躬不閱遑恤我後非我心也黃冊之數清荒田之

糧實如斯皆當同寅協恭究心致力則上不負於國下
不累於民可謂盡職矣原發至手卷候使人附去詩文
登卷但恐蕪陋之言祇塵汚耳詢知誠忠劉大尹踏田
舊治茲邑民人蒙惠亦煩申再四之意人回草草奉答
伏祈心照不具備

答縣丞魏尚質書

自去歲攝政會昌忽迫取別今春離平川不得一見至
今怏怏拙作榕軒讀易記族譜叙想已目入長司回曾

附小詩以致區區仰慕之忱今黃以和至又沐手劄佳
章良感不忘之盛心聞今歲同僚抱患公出新大尹未
到獨員署事劬勞冗劇誠不易易步韻成絕句五音少
答意雅硃匣之貺感惠永供晴窗勘讐經史之用客邸
乏物報瓊謾有黃山春茗一裹奉寄政餘汲葛洪丹井
之泉瀹之以助清話人旋草潦奉復乞亮登不具

與大尹黃彪書

近者秦淮旅邸邂逅會遇連牀夜話琅然清韻猶殷于

耳拙文俚詩繕寫成軸以寓嚮仰之情諒不我鄙也別
來遠想琴堂畫永政成訟簡良可為平川之遺民賀也
然民俗雖頑嚚而以明敏之識英斷之才處之猶庖丁
之解牛耳又當以仁恕存心以勤慎莅事則恩德普而
治績彰矣區區不能善始而欲求終不能植前而欲振
後殆若乞醯於鄰不免笑訕也茲因鴻便草率奉字伏
干照察不具備

與鍾民敬秀才書

老拙在平川三載所與共談者賴有鍾子常及吾民敬
二人而已舍斯文外無干預於公務是以始終依依之
情不能忘於懷自春首相別日月走丸又將歲暮矣長
司來得足下手書諄諄之意溢於辭語之外曾附小詩
致忱想已達近日黃以和至悉知體候安好良慰懸渴
小孫留講下多荷用心訓迪感德深非篤念平昔契
愛何能臻此但區區客中乏物將意勿責勿訝尤望始
終造就以成其學業庶毋負也後有便風附午塘清隱

文至人回舟駛此草率不一

答鍾子常書

近揚存德至辱諸文友書劄兼侑土宜祇受惶悚又寵
惠梧岡幽趣高文新詩妙翰佳畫捧玩不忍釋手雖紙
弊墨渝猶置懷袖間追惟老拙為時樛材強顏效職尸
素四載幸遂終考然無善政及民遺恩傳遠不加以唾
詈亦云可矣豈料諸文友溺愛過情誦之以文聲之以
詩情意繾綣久而不忘果何以得此也感歎感歎同僚

伴讀鍾啟晦先任贛邑司訓後調南雄今改除於此系
出越國公裔自平川分居西昌其家譜近因舟經鄱湖
遇風喪失再四致意子常於鍾幼安順曙二老儒先處
借舊譜浼鍾素昂劉以常抄錄似本示下為感區區同
一佩德也予常龕竒樵隱區區有記啟晦有叙候謄錄
諸作完備別日附去忽忽復意不度祈照亮不具

與方季善書

伏自己卯歲夏初拜別一向留贛舊年春正月考績改

除寓京每遙睇故鄉靈山蒼翠未嘗不再在目也去
冬次兒來得雲翰沐委譔生瑩文久墮稽臯未遑錄去
蓋公平生律身行己大概述之無遺明白詳贍庶可傳
久篆額書丹又得當年名士之筆刻之琬琰毋貽林谷
之羞而光輝煥發於山川後人觀之知為靜軒處士之
瑩過者必起敬也裝褫成冊奉納中間世次諱名某某
不能詳記恐有訛舛訂正錄副本用大紙比碑石樣發
來重寫正本摹刻為妙草率奉字伏乞情察不具備

與薛推府書

伏自喬遷憲府至今十載不得趨下風而望餘光令人
景仰寸心懸懸如水東注近聞復職新安之民漸濡治
化滌瑕湔垢改過遷善庶聖代無冤滯也幸甚幸甚區
區粗守家學才疎能謏不意微猥姓名交章保薦濫叨
職任僅僅以精白持心期無負也侵尋歲月已歷兩任
但當忠勤以圖報效耳他母足為知己道因便附此尺
楮以為興居調客居荒落之物侑緘會晤未卜惟冀保

愛以膺寵渥不具備


與醫士程養民書

區區強勉從仕才無寸長學無尺進今吾猶故吾也自
南京忽忽會面不得各罄所懷至今愧負遠想日來肘
後方書籠中參苓活人為念深積陰功優游城府盤桓
丘園奉親理家其樂何如也芝蘭玉樹森秀階庭但當
浚橘井之泉種杏林之春省心以俟耳康節之有伯溫
未為晚也今因宏德鄉友回便附此以致遠想之意會

晤未涯惟冀保攝以膺光大不具

與道友程惟中書

別後歲月荏苒倏經十年每想萬山脩竹蒼翠爐香茗
盜逍遙靜樂溪山一覽如出人寰何時復得吟咏於其
間也遠惟日來坐環餘暇拈弄筆劄新湧妙思深探奧
道當紹羽流之遐躅也紀績碑七星石詩文尚無恙否
今因江宏德便中附此以訊動履徐沈二尊師及諸道
友同此一一致敬相會未涯惟冀保練不一



梧桐集卷十